

中国古典精华文库

全宋词

第七部

丁无悔

满庭芳

道格天渊，令行海岳，凛然名德尊崇。云烟千里，分付笑谈中。川后波神效职，潮声细、一鉴涵空。风樯便，蛮珠贾舶，累译更遥通。

雍容。廊庙手，蓍龟先见，日月精忠。自丛机初解，眷渥尤隆。共道奇庞福艾，袞衣到，宁久居东。谯门晓，高牙大纛，辉映醉颜红。

满庭芳

偃屋霜清，棱层烟碧，玲珑移在人间。山光林色，常伴主人闲。元有仙风道骨，无心趁、玉简朝班。归来赋，不因五斗，谈笑挂衣冠。

尤难。谁不羨，商山橘乐，渭水渔竿。引相君王子，助发幽欢。满泛寿觞多祝，南溟共、北海波澜。君知否，庙堂有意，相与问寒岩。

杨再可

喜迁莺

腊天初晓，庆五色瑞云，华轩呈绕。紫府真人，丹台仙伯，合降民间荣耀。彩笔素题，篇翰未减，家声词藻。秀眉宇，俊丰标闳阔，声名都好。

富贵长欢笑。此际锦堂，移下蓬莱岛。妙舞蹁跹，清歌宛转，两行翠娥燕赵。劝饮百千钟酒，岁岁朱颜不老。春近也，看香红又怕，小桃开了。

刘仲讷

水调歌头

昨夜乘秋兴，长啸驭清风。飘然玉宇虚廊，忽到广寒宫。
解后姮娥相见，为问中秋诞节，奇特世难同。底事长庚梦，独
占此宵中。

呼金兔，寻玉策，检前踪。自从盘古有月，便有此山仙翁。
公向人间游戏，月在天衢来往，清气每相通。明月既无尽，公
寿亦无穷。

蒋思恭

水调歌头（寿张运使）

紫府制金钥，银汉夜乘槎。老仙暂驻幢节，来佐玉皇家。翠发朱颜好在，肘后有方医国，宝鼎养丹砂。谈笑功名了，身退饭胡麻。

游物外，聚紫脑，练青芽。星垣寓直有子，曾步八砖花。来岁称觞寿宴，袞绣彩衣交映，重荐枣如瓜。俯首拾瑶草，长啸卧烟霞。

水调歌头

风流九霞客，名在五云乡。十年出入华禁，簪橐奉君王。黄伞西清日转，宝月红鸾影里，长近赭袍光。彩笔赓歌处，殿阁有余凉。

跨秋风，凌宝鼎，笑芝房。人间争识奇贵，妙贴焕名章。莫羨碧幢金印，换取玉堂清琐，翰墨看淋浪。岁岁宫壶酒，雨露带天香。

张成可

洞仙歌

薰风池阁，八叶萸初展。紫府当年侍香案。见蟠桃频着子，偷荐瑶觞，贪醉寐，谪向人间未满。

青禽传近信，催赴仙班，怪我尘缘未能断。爱吴中山色好，抹月批风，蓑共笠，纵有金章不换。待驾鹤遨访蓬壶，问海水从来，几番增减。

水龙吟（春寿太守）

碧霄彩旆垂铃，应南极星躔光灿。巍巍名阀，芳传汉相，貂蝉炳焕。德莹冰壶，量包沧海，神钟岩电。向宝储内阁，英□才华，声猷著膺宸眷。

荐领名都屏翰，更循良、歌腾畿甸。峻专剧郡，荣登法从，光生尧殿。密勿论思，雍容启沃，才华独冠。愿年年长见，兰芽玉喷，柳梢金嫩。

张时甫

玉楼春（寿平江陈守）

姑苏台上春光发。菊老寒轻香未歇。人言太守是龚黄，
天为吾君生稷契。

月良庆会俱良月。万岁千秋同瑞节。明朝仙领趣提鳌，
十万人家齐卧辙。

玉楼春

蟠桃十月惊春早。春到玉梅枝上小。和羹人物应时生，
天上骑鲸生凤沼。万家宝篆祥烟晓。竞祝史君长不老。夜来南极
照元台，见说沙堤新筑了。

李朝卿

玉楼春

谪仙暂下金銮殿。开燕瑶池春未晚。飞琼献舞锦靴寒，弄玉吹箫银字暖。

寿觞阿母年年劝，犹道碧桃香尚浅。花开更待几东风，应见年华千岁换。

玉楼春

炉烟不断腾金兽。香雾入帘波影皱。秋堂锦席艳君仙，不惜绮罗萦舞袖。

昼弦素管春风手，娇妙如花轻似柳。劝君须尽眼中欢，绿酒十分千秋寿。

玉楼春

厌玉为浆麟作□。玉树琼葩长不谢。翠帘绣暖燕归来，宝鸭花香蜂上下。

沙堤佩马催公驾，月白风清天不夜。重来赫赫照岩廊，不动堂堂凝泰华。

小重山

春正浓时月正圆。华堂初燕喜，雨真仙。霞衣相对旧貂蝉。人间少，福寿子孙贤。

□□佳非烟。花光羞粉艳，敢争妍。笑歌声里捧金缸。深深愿，松柏永同坚。

鹧鸪天

万里霜空爽气高。翩翩天雁薄云霄。佳祥已协当年梦，岂但非熊可珥貂。

金笏带，紫花袍。朱衣双引玉宸朝。百年富贵须平步，仍有功名信史褒。

西江月

盛德须知异稟，天教占尽秋光。一轮明月照华堂。荐寿笙歌嘹亮。

座上簪纓并列，庭前兰玉成行。只应难老胜松篁。五福人间供仰。

踏莎行

月挂琼钩，日添绣线。骑花翻浪重帘卷。风传环佩晓珊珊，画堂羯鼓催开燕。

翠缕香凝，玉膏酒滟。仙翁莫诉玻璃满。凤衔丹诏下云电。千秋长在黄金殿。

鹧鸪天

九凤箫低彩雾高。鸾车鹤驭下层霄。天教来辅长生帝，宝殿千秋侍赭袍。

飞急召，促归朝。沙路稳为马蹄娇。功成并画兰台上，奎画重看御赞褒。

谈元范

清玉案

虾须帘上银钩小。筵内轻寒绕。红叶征香侵语笑。金钗珠履，凤箫龟鼓，疑是蓬莱岛。

萱堂日日春生貌。嫩绿休然鬓边好。赋得修龄应不少。年年长见，画梁双燕，楼外青袍草。

倪翼周

青玉案

烟浓水淡荷香浅。近翠幕、闻弦管。逸气棱层冲碧汉。绝无风骨，炼成铅鼎，未许童颜换。

长门深锁文君院。前度蛮笺泪痕满。为问乘槎人不远。只消丹桂，一枝分付，早早随伊愿。

青玉案

四时令节惟重九。况此日、逢佳偶。金菊已花杯有酒。瑶池宴罢，一枝斜插，好作渊朋友。

翠眉淡淡匀宫柳。比似年时更清瘦。双绾带儿新结就。长情恩爱，随家俭约，素与君同寿。

青玉案

薰风解尽吾民愠。正蓬渚芳遍。昨夜商周生伊旦。从来仁者，仲尼称寿，更捧金杯劝。

我有诗词三百卷。等留取、频频献。且看明年秋欲半。紫薇花下，绿槐阴外，天语颁新宴。

青玉案

熙春堂下花无数。红紫映、桃溪路。蝶往蜂来知几许。翠筠亭外，绿阳堤畔，时听娇莺语。

绮筵罗列开樽俎。况总是、神仙侣。竞举笙歌持玉醕。介公眉寿，年年此日，常与花为主。

段 倚

醉蓬莱

正星杓首舍，月律开祥，嗣兴芳序。梦协长庚，诞清朝仪羽。运继姬周，庆流嵩岳，认再生申甫。职尹京华，功宣国计，声猷兼著。

子建文章，懿侯宗范，叔度襟怀，紫芝眉宇。燕启佳辰，满东风兰雾。脆管繁弦，绣茵檀板，会饭中仙侣。世仰真贤，朝尊大老，长亲尧主。

贺 及

新荷叶

莲萼飘香，金风乍扇轻凉。郁郁葱葱，瑞烟萦绕华堂。星辰孕秀，良霄梦、吉协熊祥。紫芝眉宇，莹然如峙圭璋。

忠孝传芳，集庆门、奕世簪裳。他日岩廊，致君直上虞唐。百千椿算，争期并、鹤老龟长。年年今日，会拚一醉觥觞。

傅伯达

沁园春

白帝司权，炎宫回驭，一叶报秋。正银河高泻，金风乍扇，冰轮将满，火伞初收。吴越传芳，斗牛钟秀，间世生贤谁与俦。那堪更负，过人才气，济世谋猷。

风流花县优游，有善政廉名达郡侯。鶚书朝荐，泥封暮召，荣登桂籍，平步瀛洲。歌驻行云，舞翔回雪，寿酒深倾碧玉瓯。从今愿，愿龄齐鼻祖，名在丹丘。

郑达可

满庭芳

肥绽梅红，嫩翻荷绿，微凉时起青苹。人间福艾，都属老人星。累建高牙大纛，循良治、是处彬彬。棠阴里，丰碑纪德，仁爱浹生民。

纶巾。风物里，一筇徒倚，傲睨寰瀛。况清朝黄发，尤急谘询。第恐商山芝客，岂容便、蝉蜕功名。他时看，腰横玉带，朱紫列云仍。

念奴娇

嫩凉如水，正一天风露，秋容如沐。明日中秋今夜月，千里清辉光足。周室姬公，唐家元轨，来享人间福。老人星瑞，光芒南照檐曲。

行看裂土分茅，朱颜青鬓，好称腰横玉。便挽银河斟北斗，倾作千钟醕醖。子舍荣华，孙枝赫奕，茂盛同松竹。尊前欢笑，竞将椿算为祝。